

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 15, No. 610

原始資料: 蕭鎮國大德提供, 維習安大德提供之高麗藏 CD 經文, 北美某大德提供

No. 610

佛說內身觀章句經

失譯人名在後漢錄

一切一其心	皆聽美言訓
佛所從得道	且聽我彼經
彼空亦不斷	有行皆非常
夫行不敗壞	佛以講授經
深微難見事	非章原之句
通彼能敷演	是以故為師
從本以存本	有造法之積
從慧以除棄	上士所講說
所從因緣有	有行皆無有
亦有前世除	無知彼諸行
亦如欲演身	日親之所講
大災患無數	皆以歸流身
刪定如本文	所演眾要言
靡麗五字句	明誓以勸勉
以頌文具足	偶字音商備
若花實雜糅	皆聽彼我誨
身非人非命	不丈夫非士
若體若不艷	斯事都無彼
夫身造而有	以有即敗亡
無強皆歸命	如沫蹈踐碎
無強則無常	無常即無樂
無常亦為苦	非身身非我
身非常亦苦	非彼應為身
若體艷我有	身都無可有
若以都無體	有存亦有亡
慧者以本末	何彼已有體

若以無主者	不得以自由
有校計若此	何彼體我有
斯體身為空	體我有為虛
應因緣為有	非身逝心造
非眾人身造	亦非自身造
都無身有造	亦身無不造
以身無造者	從彼為得諦
亦非都骨節	
從前世方來	亦非天造身
非神所化城	非無行無本
無因為自有	是身有所由
有事亦有物	有本有所起
稍稍為生有	本以癡亦愛
心與愛有漏	亦有縛亦結
行二品為漏	斯為本亦餘
世與受因緣	以由彼斯身
以漸能致有	初始有精沫
精沫為轉凝	足為生兩兩
以兩為轉厚	以序有四體
為生頭第五	若干骨積聚
從行為用成	頭九為鬪體
頰[出*頁]為二骨	齒根三十二
齒三十二骨	頰為與耳本
鼻為與上腭	心與頸嚙喉
凡為骨八十	頰車與頸四
咽亦為骨四	左臂與右臂
凡有骨五十	若其斯左脇
應有十三肋	亦斯右脇然
應有肋十三	斯為四十八
三三三相連	二為二相連
其餘不相連	身者以為彊
如束葦無彊	脊膂三十二
尻與腰為三	若其斯左脾
骨為二十五	右髀為亦然

為骨二十五	肩髀有骨四	
凡三百二十	敷演名之諦	
佛以日斷嗣	彼段悉以聚	
諸根為以縫	非瘡而裹之	
肉血以塗[打-丁+茶]	如木機關縷	
為如幻師幻	骨機關亦然	
以筋纏縛成	合聚骨若此	
以為是形體	愚者莫不著	
智者而不著	生革以隱蔽	
九孔為大瘡	周匝為滲漏	
不淨腐臭處	口啄如為孔	
滿之以諸穀	是身為若此	
以進若干腑	毛髮與爪齒	
塵埃亦皮革	骨節亦骨髓	
為凡筋與脈	胃與心亦脾	
大腸亦小腸	肝與肺亦腎	
脂[月*費]亦大便	淚與唾亦汗	
鼻涕膏亦血	寒熱肪小便	
[臆-凶+山]之與[臆-凶+山]膜	皆以沈沒彼	
如泥塗老牛	如其成不知	
身之內與外	夫城骨與牆	
肉血為塗巖	為怨所破壞	
恒為以內外	彼央若干百	
以為貪其肉	其外亦災害	
皆以多尤彼	斯身腐敗壞	
譬如久故城	晝夜供侍之	
壞如已復壞	如坎與空聚	
恒盜賊俱止	取之欺殆人	
身為毒虺穴	夫毒虺劇毒	
恒于身居止	喜怒毒奸弊	
孚不和大毒	正使滿百歲	
恒以和安隱	忿則無反復	
須與復不安	斯身為災禍	
嫌而有恐畏	如虎遊荒澤	

有畏多恐怖	諸念為以仰
為一切苦器	亦為諸劇事
斯身主為受	沈於苦之法
一切諸病宅	為老死之法
身為增恩愛	苦以寒與熱
或風而不和	是則病如生
為敗壞諸根	失疾賊害人
老死竿厄人	如雪聚得火
疾而為解釋	斯若此無數
身之多災禍	吾所演一切
未能已備具	要以為諸苦
腐身為不實	多因緣以成
大耶以為軀	

佛說內身觀章句經

十一因緣章

佛言。行者有十一因緣。滅道制令人不墮惡道。當不識者。謂萬物。一為大會。謂人眾。二者多食。謂諸美。亦謂過飽。三者為多行。謂多業。四為多暄。謂多語。五為多睡眠。六為會聚。謂禪中。七為習行。謂多事。八為愛身。九為輕。謂非法語。十為貪謂多欲。十一為不好善處居。謂惡人中。行道者當斷是十一因緣。得道疾。